



Sud Bosne i Hercegovine
Суд Босне и Херцеговине

Broj: S1 3 Iž 037903 20 Iž
Sarajevo, 22.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić Čovrk, kao predsjednika vijeća, Srete Crnjaka i Vesne Trifunović, kao članova vijeća, odlučujući o žalbi Milimirke Boljanović, Mirijevsko brdo 52 N stan 7, 11000 Beograd, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je ista registrovana na više različitih adresa.

Žaliteljica je protiv navedene odluke blagovremeno izjavila žalbu zbog pogrešno utvrđenog činjeničnog stanja i pogrešne primjene materijalnog prava, navodeći da je prijavu za glasanje izvan BiH sa potrebnim dokumentacijom dostavila putem email-a, vodeći računa o roku. Nadalje, navodi da je provjerom statusa svoje prijave utvrdila da je registrovana na više različitih adresa, ali da u obrazloženju odluke nije jasno i dovoljno obrazložen razlog njenog odbijanja. Dostavlja svoju tačnu adresu Mirijevsko brdo 52 N stan 7 i navodi da ne zna ni za jednu drugu pristiglu prijavu na njeno ime. Predlaže da se žalba usvoji, kako bi mogao ostvariti svoje građansko pravo da glasa.

Centralna izborna komisija Bosne i Hercegovine u odgovoru na žalbu navodi da su za podnositeljicu žalbe dostavljene dvije prijave u kojima su navedene različite adrese na koje će biti upućen glasački materijal, te da žaliteljica nije dostavila potvrdu nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za navedeno lice dostavljene dvije (2) prijave na obrascu PRP-1-Prijava za glasanje izvan BiH, te su navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Bulevar Jaše Tomića 25 stan 49, 21000 Novi Sad, R Srbija, dok je u drugoj prijavi navedena adresa Mirijevo brdo 52 N stan 7, 11000 Beograd, R Srbija.

I po shvatanju apelacionog vijeća, druga dostavljena prijava žaliteljice Milimirke Boljanović se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositeljica žalbe podnošenjem druge prijave nije ukazala da ima saznanja o podnesenoj prvoj prijavi, kada bi se moglo cijeniti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1. Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1. citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositeljica žalbe nije Centralnoj izornoj komisiji BiH dostavila, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovana prava adresa njenog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužna dokazati podnositeljica prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Dinka Bešlagić-Čovrk